

Boh Youq Diegrog Miz Mbwkyoux

父亲在外有女友

□ Yen Byauh / 彦飙

Veiz Yenbingz dayoz bizyez le youq ndawsingz ra ndaej faenh hong ndeu, bouxgvan de hix youq ngaenzhangz yingzyezsoj guhhong, song gvanbaz souhaeuj mbouj siuj, Veiz Yenbingz couh siengj dawz daxboh Veiz Yiz daj ndawmbanj ciep okdaeuj caeuq songde caemh youq. Hoeng, daxboh de baenzlawz cungj mbouj nyienh, doiq neix, Veiz Yenbingz gig nyapnyuk. Daxboh de boux ndeu gag youq ranz, ndang youh ciengz miz bingh, gwndaenj cibfaen mbouj fuengbienh, danghnaeuz miz maz saeh liuh mbouj daengz, mbouj miz vunz ciuqgoq, baenzlawz banh ne?

Mbouj geij nanz, gij saeh hawj Veiz Yenbingz yousim caen fatseng lo. Ngoenzhaenx, Veiz Yenbingz sawq-mwh ciep daengz ranznden dwk daeuj aen dienhvah ndeu, naeuz daxboh ndaej binghgip, caeklaiq fatyienh gibseiz, cijndaej ciengjouq duetnanh. Veiz Yenbingz gipmuengz ganj daengz yihyen seiz, raemxda couh doek-byoegbyoeg. Veiz Yenbingz daj iq daxmeh couh gvaqsei, daxboh boux ndeu sinsin hojhoj dawz de ciengx daengz hung. Seizneix, yawjraen daxboh baenzbingh nyieg baenz yienghneix, baenzlawz mbouj hawj de siengsim raemxda doek ne?

Veiz Yenbingz naemj, daxboh ginggvaq baez bingh neix le, itdingh dapwnq caeuq de bae ndawsingz caemh youq. Hoeng, daxboh baenz-lawz hix mbouj dapwnq bae caeuq de caemh youq, youh doiq Veiz Yenbingz naeuz: “Gou rox gij hauqsim mwngz lo,

danghnaeuz mwngz caen dwg doiq daxboh ndei, couh moix ndwen geiq lai di ngaenz ma hawj gou.” Raen daxboh baenzneix gangj, Veiz Yenbingz doeksat dwk naeuz: “Boh, gou moix ndwen mbouj dwg geiq hawj mwngz 500 maenz la, lij caengz gaeuq ya?” Dingq ndaej gij vah neix, Veiz Yiz fatheiq lo, sing hung naeuz: “Boh mwngz yungh di ngaenz lij aeu coh mwngz veibau caez ya?” Veiz Yenbingz raen daxboh de fatheiq lo, couh gip gejnaeuz: “Couh yienghneix ba, moix ndwen hawj mwngz geiq 800 maenz.”

Veiz Yenbingz siengj mbouj daengz, daxboh mboujdanh mbouj riengz de bae ndawsingz caemh youq, lij aeu de lai hawj di ngaenz, de roxnyinh geizheih, daxboh de baenz-lawz ne? Dwg mbouj dwg miz maz saeh raen mbouj ndaej vunz?

Aenvih hong nyaengq, youh mbouj youq henz ndang daxboh, Veiz Yenbingz mbouj ndaejhongq siengj gij saeh neix, seizgan couh baez gvaq daengz nienzdae lo. Dienheiq cugciemh bienq nit lo, Veiz Yenbingz couh hawj daxboh cawx di buhvaq seizdoeng, vanzlij cienmonz yungh 500 maenz ngaenz hawj daxboh de cawx gouh haiz mingzbaiz naeng caen ndeu, doenghyiengh neix geiq daengz lajmbanj hawj daxboh de gvaqdoeng.

Daengz haemhndaep, Veiz Yenbingz ma daengz ranz caeuq daxboh gvaq ciet, yawjraen daxboh vanzlij daenj gij buhvaq gaeuq doenghbaez haenx, roxnyinh gig doeksat, cam

naeuz: “Boh, baezgonq hawj mwngz cawx buhvaq moq haiz moq, baenzlawz mbouj raen mwngz daenj ne?” Veiz Yenbingz doq gangj doq haeuj ndaw rug daxboh bae ra gij buhvaq moq haiz moq, bouxlawz rox, fan bae fan dauq caenh raen miz geij geu buhvaq gaeuq ndwi. Veiz Yenbingz youh cam daxboh: “Boh, baezgonq cawx hawj mwngz gij buhvaq moq haiz moq gvaq gizlawz bae lo?” Daxboh de caem yaep ndeu cij dap naeuz: “Aeu……Aeu bae gai lo!” Veiz Yenbingz dingqnyi le, gikheiq ndaej ca mbouj geijlai couh yaek ngunh gvaqbae.

Daxboh boux ndeu youq lajmbanj, moix ndwen yungh 800 maenz ngaenz mbouj gaeuq, hawj Veiz Yenbingz ndaw uk naemj ok aen siengjap ndeu, dwg mbouj dwg daxboh youq diegrog ciengz miz saek boux mbwkyoux ne? Daxmeh gvaqsei ndaej caeux, daxboh boux vunz ndeu youq ranz……Yienghneix baez siengj, Veiz Yenbingz couh rox gij saeh neix dwg caencaen cingqcingq miz lo.

Ndwenlab haemhndaep ngoenz gaxgonq, Veiz Yenbingz caeuq doengzdoh bae yienzsingz cawx huq gvaq nienz. Veiz Yenbingz dangeiz simcingz gig ndei, de byaij youq gwnz gai, raen boux hauxseng ndeu baij dan gai gij dangzrwi duzrwi gag ciengx canj, Veiz Yenbingz baez ngonz boux hauxseng neix couh doeksat lo, yawjraen gij da naj de lumj daxboh nei, doengzseiz youh raen de daenj

gouh haiz gij yienghceij lumj baezgonq de cawx hawj daxboh.

Veiz Yenbingz goq mbouj ndaej baenzlai, de couh haibak cam: “Daihgo ya, gouh haiz naeng caen mwngz caen ndei yawj, youq gizlawz cawx ne?” Byawz rox, boux hauxseng neix yawj miz boux vunz ndeu gwq yawj de, seizneix lij cam gij coenz vah neix, engqgya simvueng, ganjgip byaij lo.

Youq gwnz roen maranz, Veiz Yenbingz itcig cungj naemj, boux hauxseng haenx caeuq daxboh baenz-neix doxlumj, dwg mbouj dwg lwgndai daxboh ne? Gouh haiz naeng caen haenx gangj mbouj digh couhdwg daxboh soengq hawj de ne! Daxboh moix ndwen lij cungj heuh de geiq baenzlai ngaenz, dwg mbouj dwg hix dawz daeuj hawj daeg hauxseng neix ne? Veiz Yenbingz yied siengj, couh yied sim nyapnyuk, daengz ranz le, mbouj caeuq daxboh de gangj saek coenz vah couh hwnj congz bae ninz.

Couh yienghneix, bohlwg youq caemrwd ndawde gvaq le haemhndaep. Nienz co’ngeih, Veiz Yenbingz yaek dauq ndawsingz, Veiz Yiz hix mbouj naeuz maz, de itcig ndwn youq bakdou da yawj dahlwg okdou byaij gyae.

Veiz Yenbingz byaij ndaej yaep ndeu, Veiz Yiz couh ganj haeuj rug bae cagaenj suek gij huq Veiz Yenbingz cawx ma, yaek soengq bae hawj vunz. Hoeng, mbouj liuh daengz, Veiz Yiz baez okdou mbouj geij nanz, couh miz vunz riengz laeng de.

(caengz sat)

Vah bouxbien: Ndwen 8 ngoenz 13, gij cingzcik bi 2018 Sawcuengh Vahcuengh suiyingz gaujsi okdaeuj lo. Ciuq Swcigih Minzyijveij naeuz, gaujsi faen cogaep、cunggaep、gaugaep 3 aen daengjgaep, cogaep miz 57.5% vunz gizgwz, cunggaep miz 40.9% vunz gizgwz, gaugaep miz 19.5% vunz gizgwz, ndawde miz haujlai vunz gauj ndaej faen sang, caemh miz haujlai bien cozvwnz sij ndaej maenhndei. Seizneix dou dawz gij faenzcieng youq gaujsi cunggaep sij ndaej ndei caemhcai ndaej faen sang daengh okdaeuj, hawj caezgya caemh ngonz.

Miz vabsug gangjnaeuz: Va nding baengh daengngoenz, vuenyungz baengh miz dangj. Gou lij doegsaw couh dingqnyi gij vabsug neix lo.

Mbouj miz gungcanjdangj couh mbouj miz Cungguk moq. Mbouj miz gaijgwz hailangh, couh mbouj miz vuenyungz swnghhoz ngoenzneix.

Ndaw mbanj gaxgonq lij caengz ndaej doeng ci, daeh doxgaiq okbae gig mbouj fuengbienh. Vunz ndaw mbanj cungj gangj: Gik mbouj dai hix hoj, doj

Gaijgwz Hailangh Ndeicawq Lai

改革开放好处多

□ Loz Hijdanh / 罗喜丹

mbouj dai hix ndoq. Ndigah bouxboux gaenx guhhong, hoeng, couhsuenq baenzneix, gaenx guh bi daengz byai, haeux hix mbouj gaeuq gwn.

1978 nienz, Cunghgoz Gungcanjdangj daezok youq guk raeuz sizhingz gaijgwz hailangh, daj seizhaenx hwnj, gij yiengh singz mbanj guk raeuz bienqvaq hungloet. Haw singz gyaeu lo, lajmbanj bienq seuq lo. Lwgminz cungqvunz cungj caencaen yiengjsouh daengz gij ndeicawq gaijgwz hailangh.

Daj guh mbanjmbanj doeng goengloh le, gaxgonq roennamh gumzgumz gemxgemx gaenq bienqbaenz roensuijniz bingzbwdbwd. Seizneix, boux ndaw mbanj bae haw gig fuengbienh.

Gaijgwz hailangh le, gij cizlieng yinzminz swnghhoz ndaej daezsang lo, ranzranz miz ranzlaeuz, youh miz haujlai gyahgi, miz binhsiengh、densigih、gunghdiuz daengj gyahden, lij miz haujlai saejdaeuz gwn.

Gyauyuz fuengmienh, guk raeuz sizhingz gouj

bi yivu gyauyuz, ranz lawz miz lwnyeiz cungj aeu bae hagdangz doegsaw hagsib, cijmiz nyinhcaen hagsib, cij ndaej baenzcaiz. Cihsiz dwg doenghyiengh cieq ndei ndeu. Mbouj miz cihsiz vwnzva couh nanz gaemguenj gisuz bae gaijgwz guk raeuz.

Seizneix, nungzminz gvaq ndaej gig ndei, guh reihnaz haujlai cungj aeu gihgi daeuj guh, yienghneix, nungzminz couh mbouj yungh baenzlai sinhoj lo. Doengh naz naj mbanj baengzyoux gou caen gvangqlangh, yawj mbouj raen hamq. Baihlaeng ranz de miz song go makmaenj、sam go makdauz, bibi cungj fungsou.

Youq gwnz haw, miz haujlai doxgaiq daj rogguek daeh haeujma, raeuz mbouj yungh bae rogguek couh ndaej cawx gij doxgaiq rogguek lo.

Gaijgwz hailangh ndeicawq miz haujlai, yinzminz guk raeuz swnghhoz yied daeuj yied ndei. Vuenyungz baengh miz dangj, docih Cunghgoz Gungcanjdangj!